

Соколёнок



2/2019

март-апрель

# Лашын



БАЛАЛАР УШИН ЭКИ АЙДА БИР КЕРЕ ШЫГАТАГАН РЕСПУБЛИКАЛЫК ЖУРНАЛЫ

Сулейман Стальский агайга

150 жыл









# Муса Курманалиев ➤

## НОГАЙ ПОЭЗИЯСЫНЫНЪ ОБЪКТЕМЛИГИ

**М**уса Курманали Улы Курманалиев – шайыр, коьшируьвши, Ногай совет адабиятынынъ негизин салушшылардынъ бириси. Ол 1894-нши йыл 15 март куьн Ставрополь крайынынъ Каратоьбе авылында, ярлы аьлде тувган. Бас дегенде авыл медреседе билим алган. 20-ншы юзйыллыктынъ 20-ншы йылларында белгили Ногай ярыкландырувшысы Абдулхамид Джанибеков пан ювык кепте танусыв эткен эм сол танусув эм ювыклык оьмирге сакланган демеге боламыз. Джанибеков пан бирге латин негизинде Ногай алфабитин эм орфографиялык йорыгынынъ сводын туьзуувде белсен кепте ортакшылык эткен, онынъ коллары австыннан Ногай мектеблерининъ 1-4-нши класс учебниклери шыкканлар. 40 йылдан артык заман Муса Курманалиев окытувшы болып, Терекли-Мектеб орта мектебинде сонъ Кызлар педучилищесинде ислеп келген.

1936-ншы йылдан алып СССР язувшылар Союзынынъ агзасы да болган. Яратувшылык аьрекетин Муса-агайымыз 20-ншы юзйыллыктынъ 20-ншы йылларында баслаган болып коьринеди демеге керек. 1931-нши йыл Ставрополь край баспасында бизим кишкей балалар уьшин «Балалар йырлары» деген биринши поэтикалык йыйынтыгы шыккан. Оннан сонъгы йылларда «Язлык анълары», «Булытлар шашылдылар», «Шоьл тавысы», «Канатлы юрек» йыйынтыклары дунья коьргенлер.

Муса Курманалиевтинъ яратувшылыгында коьшируьвши аьрекетин де уйкен орын туткан демеге болаякпыз. Ол оьзининъ ана тилине Александар Пушкиннинъ «Алтын балык акында эртегисин», «Патша солтан акында эртегисин» коьширген



эм баспалаган. Оннан баскалай болып, Корней Чуковскийдинъ, Самуил Маршактынъ эм баскалардынъ коьплеген асарларын да коьширип келген.

Коьп йыллар узагында педагогикалык тармагында белсен кепте ислегени эм уйкен уьстинликлерге етискени уьшин ога «СССР-динъ ярыкландырувынынъ отличниги» деген ат та талылган.

Сыйлы агайымыз эм белгили шайыр Ногай районнынъ Терекли-Мектеб авылындагы оьлигине коьмилген. Куьнбатар авылынынъ орта мектебине онынъ аты койылган эм бюсти де ерлескен. Онынъ тувган-оьскен авылы Каратоьбе мектебине де онынъ аты тагылган эм онынъ алдында шайырдинъ эстелиги де ерлескен.

Муса Курманалиевтинъ тувганлы 125 йыллыгына багысланган шаралары ногайлар яшайтаган регионларында аьлиги заманда кенъ кепте оьткерилип турады демеге керек.

*С.Култаева.*





Шайыр эм педагог Муса Курманалиевтинъ 125 йыллыгына

# Дослыктынъ эм абдимиктинъ йыравшысы

**«ОМИРИДИ БАГЫСЛАДЫМ,  
АЯМАЙ ДЕННИНЪ КУЪШИН,  
ЯЗГАН ЯЗУВ ИСИН  
ЮРЕКТЕН ХАЛКЫМ УЪШИН.  
КАРТАЙГАНДА МЕН БЕРДИМ  
БИЛИМИДИ ЯС-ЯВКАГА.  
ОЪЛСЕМ ДЕ КУЪНИ ТАНЪЛА  
ОЪКИНИШ ТУВЫЛ МАГА»,**

– деп язган оьзининъ сосы сыдырала-рын заьлим ясына келген шагында сыйлы агайымыз, Ногай совет поэзиясынынъ негизин салувшылардынъ бириси эм ишиндеги тирииси болган Муса Курманали улы Курманалиев.

Агайымыздынъ оькингендей эш бир заты да йок. Ол арамыздан кеткенли нешеси он йыллар оьтип бараятырсада, халкымыз тап тиридей оны коьрип келеди. Онынъ язып калдырган аьлемет ятлавлары эм дестанлары халкмыздынъ авызыннан таймаган, оларды мектеблерде окувшы балалар, университетте студентлер уйренедилер. Онынъ соьзлерине язылган йырларын авылларда картлар да, яслар да йырлап келедилер... Айтпага, «Мен бир ногай кыз эдим» деген йыры ногай еринде гимнге айланган десе, бир янъылыс та болмак. Оны шоьл кыскааяклылары мине буьгуьнде де хатын-кызлар байрамында йырлап турадылар эм келеектеги несил де йырлаягына эш бир шек те йок. А сосы йырга юз йыл да болган... Шайыр Курманалиев шынтысы ман совет ногай поэзиясынынъ негизин салувшылардынъ бириси болып калган эм аьли де калаяк.

Мен оьзим де агайымыз бан Кызлар каласында пенсияга шыгып яшаган заманда танысып, уьйинде бир неше кере болганман эм оьзининъ авызыннан балалык шагы, яшав йолы, поэзиясы акында айтканын тынълаганман эм бириншилерден болып онынъ акында уьйкен очеркимди де язганман. Оны ман йолыгыскан аьр вакытым эм оннан эситкен аьр бир соьзим мага бек ювык эм мени аьли де ийги коьнъил-

ли этип турады: онынъ танълыгы, ногай халкын суьюви, бурынгы халк яшавын билуьви эм анълавы, аьдетте болмаган терен билимлиги, халк фольклорын арымайталмай йыйнавы эм оьзининъ яшавын кызганмай халкына багыславы, уьйкен эм кишкей мен ортак тил тавып соьйлесуьви. Онынъ яратувшылыгы не ягыннан да бай эм емисли демеге боламыз. Бурын бизим ким болганымызды ол мине сыдырала-рында суьвретлейди:

**Ярлы болып,  
Арып, талып,  
Байга барып,  
Ялга юрип,  
Коьп кыйналып,  
Азак алып,  
Кытлык коьрип,  
Кайгыланып юрген бизбиз.**

Болса да сол авыр заман кеткенин шайыр оьмири мутпаган эм мутпайды:

**Патша тагын,  
Молла, байын,  
Властьлерин  
Бузган бизбиз!  
Эркинликти,  
Бу тенъликти  
Эм кенъликти**

**Алган бизбиз!** – дейди эндигиси йылар оьткенде.

**Мен юрген йол  
Туман эди, суьриндирди.  
Ол йол ман  
Коьп адастым яслыгымда...**

Сол авыр болып оьткен яслыгын эсинде саклай турып, аьлиги ясларга маслагатын береди:

**Сизге, яслар,  
Аьр йолда да яна юлдыз.  
Халкым эткен  
Оьсиетин сиз окынъыз!**





Бизим ясларымызга аьлиги яшавдынъ онъайлыгын, куваты барлыгын, моллык келгенин билдирип, оны тагы да ийгилендирмеге, ярасык этпеге шакырады:

– *Фантазияды*

*Яшавга да салады.*

*Электрик*

*Ракета ислеп турады.*

*Биздегиндей*

*Еннет яшав кайдады?!*

Сосы келген яшавда эндигиси онынъ алал дослары да, тенълериде барлар:

*Кеш болганда*

*Коьринеди юлдызлар.*

*Юлдызлардай*

*Айдай алал йолдаслар.*

*Баскалардай*

*Болып турмай эректе.*

*Коьнъил авлап,*

*Кувантады юректи...*

Обзининъ язып калдарган аьлемет асарларында Муса-агай эм шынты шаьйир обзиннен сонъ келетаган несилди аьдем болмага шакырады, халкына алал юрекли инсан керегин айтпай болмайды. Мине сосы сыдыралардан ок оны аьруув анълаймыз:

– *Тувган элинъ,*

*Тувган халкынъ эш мутпа сен,*

*Не аьдемсинъ*

*Ис оларга сен этпесенъ?!*

Бир ок заманда ана эм бала темасы да



онинъ яратувшылыгында айырым орын бийлеп турганы да сезилмей болмайды.

– *Йыласа да*

*Энълеп оны уйклатады.*

*«Сакларым» деп,*

*Обз коьнъилин кувантады.*

*Картайганда*

*Оннан яшав ол куьтеди,*

*Анасындай*

*Ким суьеди балады?*

Муса Курманалиев яшавынынъ сонъгы такыйкасына дейим ана ерин, онынъ топырагын суьйген, аявлаган эм ога куллык эткен. Мине «Ер» деген ятлавыннан бир уьзиги де:

– *Ай, ер, ай, ер сен,*

*Баъри заттынъ анасы.*

*Сен уьстинъде*

*Туьрли обсимликлер баъри.*

*Аьдем, айван,*

*Ян-янувар аьр бири.*

*Пайдалы казылмалар,*

*Карынынъда яталар...*

*Сен байлыгынъ*

*Аьр аьдемнинъ дени мен...*

Мен тагы да бир кере сыйлы шаьйирдинъ ятлавларын окып келеятырган ясларга эм кызларга Муса Курманалиевке усап, обз халкымыздынъ патриоты, оны анълавышы эм оны суьювши болынъыз деп айтар эдим. Бар бизге, ногайларга, кимнен коьрип алмага, кимге усамага да, солардынъ бириси быйыл март айында тувганлы 125 йыл толтаган ана адабиятымыздынъ классиги эм обктемлиги Муса Курманалиев...

*А.Култаев,*

*Дагыстаннынъ язувшылар*

*Союзынынъ секретари.*





# Савлай халкка кереги

Тынышлыкка, наьсипке  
Керек тилдинъ бирлиги.  
Бир ниетте болганлар,  
Бирлесуьви белгили.  
Куьресуьвде – бирлесуьв.  
Байга-болат билеги!  
Тыныш яшап, кенъ наьсип –  
Савлай халкка кереги.

## Илми тавга

Илми болсын,  
Яслар, кызлар, каьринъиз,  
Илми тавга  
Оьрленинъиз, барынъыз,  
Ол тав-наьсип  
Ашкышы аьр билгенге.  
Аьр мыратка  
Еткерер ол аьр кимди.

Билимсиз ис –  
Кумга урлык шашкандай.  
Илми мен ис –  
Алтын капы ашкандай.  
Билим ал сен  
Айга коьпир салысып,  
Куллык та эт,  
Тавды ярып, шаласып.

Билим минен  
Ис коьрсеткен оьрленер.  
Билим алып,  
Ислемесе – кирленер.  
Билип илеп,  
Ис коьрсетуьв – оьр куллык.  
Эм сага да  
Эм Элге де яхшылык.





# Обтпек

Дуныяда туърли-туърли  
Даъмли, таътли аслар коьп.  
Аьдем уьшин кара обтпектен  
Баа зат дуныяда йок.  
Денге дем, канга дарман  
Асларымнынъ энъ басы –  
Мен айтайым, обтпек кара.

Обтпеке емей баска туърли  
Азыклар ман яшап кара...  
Дуныяда баалы заттан:  
Алтын да эм куьмис те – тас.  
Кобпти аслар, аман да,  
Кара обтпектей азык болмас!





# Анады аявлайык!

**Б**урынгы заманнан алып ата-ана акында коьплеген ийги соьзлер айтылып келедилер эм заман олардынъ дурыс экенлигин коьрсетип келеятыр демеге керекпиз. Айтпага, «Ата-билек – ана-юрек. «Ана койны – балага еннет», «Ана коьнъили – баллада, бала коьнъили – далада» эм сондай баскалары.

Мине аналардынъ халклар ара куьни де келип калды. Соны ман байланыслы булай зат акында тагы бир кере айтып озбага суьер эдик. Нега десе заман туьрленеди эм аьлиги шакта ана ман балалар арасында байланыслар да туьрленедилер. Тек ийги ягына карап туьрленсе яде авысса, ким ога суьийинмеек. Суьийинер эм оьктем болар, биз де солай болганын суьемиз...



Дуныя юзинде анадан ювык, анадан баалы эш бирев де болмаган эм болма да болмаяк. Бир ана да оьзининъ аьвлетине яманлык йорав этпеген эм этпеек.

Аьр бир инсан оьзининъ анасына тынълап эм онынъ айтканын этип юрсе, эш бир заман яман йолга туьспес, яшавында келиспеген затларын да этпес. Анасыз болган такыйкадынъ оьзин куьдиретли кудайым биревге де бермесин. Ийги астынъ оьзин ана аьзирлесе, бас деп баласына соны ашатпага ымтыслы болып турады. Оны аьр куьн сайын аьр бир аьелде сеземиз эм коьремиз. Ана коллары бисирген астан даьмли ас ер юзинде аьлиге дейим болмаган эм болмаяк.

Баьри де балалар ер юзиндеги аналарын бас деп сыйламага эм оьрметлемеге керекли боладылар. Аналар нешеси йыллап кешелер мен уйкламай танъ аттырганларын тек бир оьзлери биледилер, ийги анълайдылар эм ол затка эш бир заман оькинмейдилер.

Аьли биз оьзимиз уьйкен эм аьелли болган заманда анамыз асын заманында ашасын, заманында бираз ял алсын, заманында аьруьв уйкласын деп каста этпеге борышлымыз.

Кишкей кеделер эм кызлар, аьр заман ананъызга тынълавлы болынъыз, эш бир кере онынъ юрегин авыртатаган соьзлерди авызынъыздан шыгарманъыз эм ол турган ерде бир авыр соьзди де айтпанъыз. Уьйкен болганда, анага яхшылык этпеге шалысынъыз. Анадынъ эткен баьри ийгиликлери сизге, балалар, он кере артык болып кайтаяк.

Ана – еннет. А еннет болса – анадынъ аяк туьбинде.

*Аьзирлеген А.Утеев.*



# 8-нши март – халклар ара хатын-кызлар куьни

*8-нши март куьни – халклар ара хатын-кызлар куьни. Аналар байрамы, бизим байрам. Сосы байрамга катнаслык этпеген аьдем болмас.*

Сол куьн баьри де хатын-кызларга уьйкенлер де, энъ кишкейлер де озлерининъ суьйимин, аьдиллигин, куванышын эм рызылыгын савгалайды, айтады. Халклар ара хатын-кызлар куьнинде биз кутлаймыз аналарды, аптейлерди, карындастарды, келинлерди. Сол куьн бизим кутлавларда баьри де кыскааяклылар суьйинип аладылар.

Халклар ара хатын-кызлар байрамы язлык басында белгилинеди.

Байрам келуьв мен бизим элимизге, еримизге йылылык келеди.

Дунья савлайы янланып баслайды. Аьр заман да солай болган эм соьйтип

те калаяк. Нега десе хатын-кызлар бизим аьр биримизге энъ де ювык, энъе де сыйлы аьдем.

**Сав болынъыз, хатын-кызлар,  
Буьгуьн сизинъ сыйлы байрам.  
Алынъыз сиз коьп кутлавлар,  
Бизим юрек айтаган.  
Биз кутлаймыз, йылы кепте,  
Ак юректен суьйинип.  
Язлык байрам, кел, кел, кел,  
Сени сагынышлы куьтемиз!**





# Терекли-Мектеб акында

(баллада)



Мен боламан  
Карлы тавга мингендей,  
Куванаман  
Эм бийиктен карайман.  
Алдымдагы  
Аьдемлерди коьргенлей:  
Ярайма? – деп  
Сорап-сорап аламан...

Олар да бир  
Тамашага калмайлар.  
Куьледилер  
Ювык досын коьргендей.  
Колларымды  
Сыгып-сыгып алалар –  
Разылыгын  
Мине буьгуьн бергендей!

...Сен паркынъа  
Келген сайын киремен.  
Баьтирлердинъ  
Эстелигин коьремен.  
Аьр бирисин  
Йылы кепте сыйпап мен,

Олар атлы  
Орамларга туйсемен!

Юрген сайын  
Коьз алдыма келеди,  
Аьр баьтирдинъ  
Тиридеги келпети.  
Сенде олар  
Тириде коьп юргенди –  
Эсинъдеме,  
Айт, эндиги, Терекли?!

Аьр бириси  
Кирген бизим таьрийхке,  
Атларын да  
Эскеремиз, сый этип.  
Олар сага  
Тирев эди керекте –  
Яс несилге  
Оьмир-оьмир бир коьрим!

Паркынъдагы  
Ердинъ аьр бир кесеги,  
Баьтирлеринъ





Эш бир заман мутпайды.  
Биздей болып,  
Йыя берип эслерин,  
Олар кайда? –  
Деп сорап та карайды...

Келгеннен сонъ,  
Кетуъв де бар, билесинъ.  
Бер колынъды,  
Сен Терекли-Мектебим.  
Конак болып  
Сенде бугуън суъиндим.  
Энди сама  
Кайтар йолга туъсейим!

Билдим энди,  
Анълатайым тек сага:

Сен мага бир  
Эресейли Москва!  
Билмеймен ким,  
Мен разы ман, сен анъла.  
Суъйген яным,  
Ана кепте ярата!  
Сонъ кайтаман  
Мен калама алгасап,  
Тереклимди  
Коъргениме обкътемсип  
Шоъл ордама  
Мен келермен кайтарам –  
Досларым ман,  
Шатлык болсын суъйинип!..

*Октябрь, 2017, Махачкала*





# Иси мен оърметъ казанган Ана



лининъ биринши заместители Анатолий Карибов. Ол оъз соьзинде аьелде анадынъ кайдай орынды тутатаганын, ямагат яшавда да онынъ сыйы, абырайы акында айткан. Сонъ республикамыздынъ атаклы хатынларын савгалаган: билим, медицина,



**К**оьп байрамлар боладылар йыл бойынша Элимизде. Ана куьни болса 1998 йылдан алып белгиленеди. Эм аналар энъ ювык аьдемлериннен кутлав соьзлер, савгалар аладылар. Анадынъ орнын ким авыстырып болак? Эш бирев.

Махачкалада «Дослык уьинде» Дагыстан аькимбасларынынъ хош коьрип алувы ман аналар куьнине багысланган байрамады йогары аьлде оьткергенлер. Ногай районуыздан онда яслар ман ислев организациясынынъ етекшиси Зухра Сулейман кызы Аджиманбетова, «Матери России» деп аталган Савлайроссиялык куьбининъ Ногай районуыз бойынша етекшиси Эльмира Кучелаева, «КЦСОНда балаларды канагатлайтаган боьликтинъ етекшиси Альбина Агисова эм «Абдул-Малик» крестьянско-фермерский хозяйстводынъ етекшиси Эльмира Келдимурат кызы Адисова катнастылар. Байрамды ашкан РД Правительство Председате-

авыл хозяйство тармакларында ислегенлерди, коьп балалы, онавдан артык балаларды тербиялап оьстирген, балалар уьиннен алып саклаган аналарды. «Баьтир анасы», «Нано мама», «Анаисши», «Коьп балалы ана» деген номинациялар бар эди. МР «Ногай район» баргылав комиссиясы 12 аьдем кандидатурасын карап, тамамында баргылавга Карагас авыл администрациясыннан «Абдул-Малик» атлы крестьянско-фермерский хозяйстводынъ етекшиси Эльмира Адисовады сайлаганлар... «Мама – труженица» деген баргыды, медальди, савгаларды алаятканда Эльмира Адисова акында видиоматериал коьрсетилип турган, сав йыйылгын халк авыл хатынынынъ авыр куллыгын коьргенлер.





Биз Эльмира Адисова уьшин бек суьйиндик, неге десе ол баьримизге де бек куллыкшы хатын деп белгили. Оьзи коьп балалы аьелде оьскен, балалай анасыз эрте калып, баьри куллыкка да шыныккан, сыйыр да савган, кой да баккан. Сога коьре ол бир де куллыктан кажымаган аьдем. Ян косагы Салавдин Адисов пан бирге мал ман 1995 йыл, совхоз бар заманда ислеп басладылар колларында эки кишкей балалар ман, Зиявдин кедеси тек эки айлык бала эди. 2000 йылда совхоз бузылган сонъ, мал ман каьр шегуьвин бардыра берип, оьзлерининъ байыр ислерин оьрлендирип басладылар. 2013 йылда дейим Эльмира Келдимурат кызы ян косагы

Салавдин, Зиявдин улы ман телбегеди бирге тартып, каьрип кыйыналары ман дунья курып турдылар. Бек авыр эди кыскажклыга суьйикли эрин йоймага. Исши хатын, баьырмалы ана, эдаплы келин, юмарт юрекли аьдем. Мине соьйтип билемиз биз оны. Кызы Суьйимбийке Карагас авыл орта мектебин уьстинликли кутарып, окытувшы кесписин сайлаган, авыл йигитимиз бен аьел курып, кызлы да болды. Аделина кызы эм увылы Абдул-Малик мектебте суьйип окыйдылар. Балалары уьшин куват тавып, эринининъ соьзин ерге туьсирмей яшайды авылымызда Эльмира Адисова эм ол тийисли баргыды алганы ман баьримиз де кутламага суьемиз.

## Шатраш ойнавшылар алдыда

23 навруздан алып 30 наврузга дейим Гамзатов атлы многопрофильный гимназияда шатраш бойынша республикалык турнир оьтти, онда бу йыл 38 мектеп катнасты. Джанибеков атлы орта мектебининъ окувшылары сосы турнирде биринши кере катнасып, оьзлерининъ ийги атларын шыгардылар. Мектеплер арасында олар сыйлы экинши орынга тийисли болдылар. Яс шатраш ойнавшыларымыз бан оьктемсимей болмаймыз. Олар Ренат Озганбаев (3вкл), Аман Саитов (4в), Наиля Озганбаева (7в), Джамбулат Камалов (11кл). Енъуьвшилер дипломлар эм акшалай баргы алдылар. Эндиги сосы енъуьвшилеримиз Избербаш каладынъ «Солнечный берег» деп аталган лагеринде август айда озажк «Каспий – море дружбы» деп аталган халклар ара шатраш турниринде катнасажклар. Онда да тек алдыда болганын йораймыз. Окувшылар, алдыга!



Салимет Майлыбаева.





# Илмиге Ынтылыс



Аварбийке оъз исинде сол со-равларды, маъселелерди шешпеге тенълерин шақырады. Бу куънлерде ол «Бесик йырлар» деп атап альбом йыйнап баслады.

Энди де арман Аварбийкеге йораймыз оъз куллыгын уъстинликли бардырмага.

*Карасу орта мектебинен  
оқытувшысы Зарманбетова Ф.Б.,  
3 класс етекшиси.*

Увыт айында илми куънине багысланып Каспийск калада излев проектининъ «Науки юношей питают» деген базласувы озды. Карасу орта мектебиннен 3 класс окувшысы Арунова Аварбийке катнасты. Ол базласувда «Бесик йырлар» деген темасын яклады. Арунова Аварбийке 3 орынга тийисли болды. Грамота тапшырылды.

Бесик йырлар ногайдынъ бурывнан алып калган аъдет йырлары. Бесик йырлардынъ маънеси бек уыйкен. Ана таза юмсак сеси мен йырлап баллады уйклатады. Бесик йырларында ногай халктынъ яшавы, аъдетлери айтылады. Бесик йырлары табиат пан да байланыслы.

Ана оъз йырында баласына суййимин коърсетеди, келеекте наъсипли яшавды йорайды. Бала бесик йырларын тынълап, оъз халкынынъ таърийхи мен де танысады.

Алиги заманда бесик йырлары мутылып бараятар. Балаларды бесикке салмайдылар.





# Обли эм тири бабтирлер (эртеги)

**Б**урын-бурын заманда, бурны йырттык заманда, айванар аьдемлер мен бир тилде сойлейтаган заманда, бир ногай авылда бабтир йигит яшаган болады. Бабтирдинъ тек бир карт анасы болган болады, ол бек суйеди кедесининъ келин аькелгенин. Бабтирдинъ болса коьптен уьйленмеге заманы келген, ама ол оьзи яраткан кызды аьли де коьрген йок экен. Бир

куьн кеше уьклап ятканда, ол туьс коьреди.

Туьсинде сондай да ыспайы кыз коьз алдына келеди: кара шашлы, кара мойшактай коьзлери мен, узун кирпиклери мен, ап-ак юмсак юзи мен... Ол анасына айтады: «Анам, сен мени йиберсенъ, мен туьсимде коьрген бир сылуды излеп шыгар эдим!»





Анасы разы болып оны йолга салады. Йолда атланып бараятырып, облик-тинъ касына еткенде ол озъ коьзлери-не ынанып болмастай зат коьреди. Бир аьдемлер камырдан бир оьлген аьдем-ди шыгарып, шыбырткы ман тоьбелеп ятырлар. «Эээ, кардашлар, сиз нетеси-ииз, обликтен шыгарып тоьбелегендей бу каьрип аьдем сизге не эткен?!» – деп кыйналып сорайды баьтир. «Бу бир яс йигит эди, бизден тири заманда коьп акша алган эди, сол акшады ол бизге кайтарып бермеген. Соны уьшин ашу-вымызды соьйтип сама алайык деп, оны тоьбелеп олтырмыз» – деп яваплай-дылар. «Ол сизге не шаклы борышлы? Мен берейим! Тек кайтарып коьминъиз оны!» – деп тилейди. Тоьбелейткан аьдемлер бек суьйинип онынъ айтканын этедилер. Акшады баьтирден алып йол-ларына туьседилер.

Бир аз заман кеткен сонъ, баьтир ар-тыннан бир сес эсители: «Тири баьтир, токташы!» Токтап, артына бурылып караса, ап-ак ат минген, уьстинде ап-ак кийими болган бир йигит, атынынъ ту-якларын токылдатып, янасады: «Ас са-ляму алал йигит, мен танийман сени эм эткен яхшылыгынъа бек разыман. Мен оьли баьтир, а сен болсан тири баьтир. Яслай оьлип кеттим, бир борышым-ды бермеге уьмирмедим, а сен болсанъ мени камыр кыйналувымнан куткар-дынъ, сав бол. Сен яшав йолында коьп яхшылыклар этпеге керексинъ халкка, соны уьшин мен сенинъ янынъа Алла-таладан тилеп, бир аз заманга коьмекке келгенмен!» Оьли баьтир мен тири баь-тир айырылмас дос-йолдас болып бир-ге юрип, бирце йолга шыгып барады-лар. Юре-юре олар бир патшалыктынъ шетинде яшайтаган бир курткадынъ уьйине келип токтайдылар, оны ман олтырып хабарасадылар, патшалык-тынъ яшав аьлин сорайдылар. «Бир аяк сув берши бизге, анай, йолдан тамагы-мыз курыды», – деп тилейдилер. «Йок, йигитлерим, мен сизге сувды берип болмайман!» – деп яваплайды куртка. «Бу не алаMAT болган, аьдем эгин-тегин

Алла берген сувды кызганама?» – деп тамаша этедилер йигитлер. Сонда курт-ка яваплайды: «Сиздей куватлы йи-гитлерден сувды калай кызганар эдим, эгер ол бизде эркин болган болса. Бир-генекей бир коьл бар, ол да 3 баслы йы-ланнынъ колында, оннан да тегинлик пен сувды алув кыйын: аьр ай сайын сув алув уьшин, бир кызды ога сойып, кур-манлыкка бермеге керек. Тоьгеректе кызларымыз да аз калдылар, аьдемлер де сувсыз кырылмага турылар!» – деп картлыктан туьсин йойган коьзлерин-нен коьз ясларын актырып, яваплай-ды анай. Неше йигитлер сол уьш баслы йыланды оьлтиремиз деп, оьзлери сув астына кеткенлер, азраил йыланга ем-тик болган экенлер. Оьли баьтир мен тири баьтир патшалыктынъ ханына барып, сол 3 баслы йыланды биз енъ-ип, халкка эркин сув аькелмеге суье-миз дейдилер. Хан оларга сиздей неше баьтирлер де соьйтип келгенлер дейди. «Аьше биз сол баьле келтирип турган йыланды оьлтирсек, не бересинъ биз-ге?» – деп сорайдылар. «Сизге не керек, соны берермен: алтын-куьмис, йылкы, туьсе» – деп хабарлап турганда, эсик ашылып байдынъ кызы киреди боьлме-ге. Тири баьтир авызын ашып калады ол онынъ туьсине энген ярасык кыз бо-лады эм ол патшага айтады: «Мага бай-лык керек тувыл, мага сенинъ кызынъ керек!» – дейди. Патша сонда ок разы болады. Йигитлер де тамаша этедилер неге соьйтип тез явап берди экен деп. Соьйлеседилер. Соьйтип эки баьтир ба-ягы курткадынъ уьйине келип, болган хабарды айтадылар. Куртка айтады: «Ол кыз ша бир неше кере киевге барып шыккан, ол барган йигитлер бир кеше-ден артык яшамайдылар! Сизден алдын неше байлар, баьтирлер оьлгенлер оны аламан деп». Оьли баьтир тири баьтир-динъ кыйналганын коьрип: «Сен аьли мунъаймай тур, заманы еткенде коьрип алармыз!» – дейди.

*Юлбалдыев Заир,  
Тарумов район, Йогары  
Таловка авылы.*







# ...Обзине аьел тапкан

(табасаран эртегиси)

**Б**ир бай аьдем яшаган. Байдынъ бир улы болган. Аьдетинше байлар акылсыз боладылар. Тек мундай акылсыз бай улын аьлиге дейим бирев де коьрмеген. Ога ким не зат айтса да, ол коьзи мен кылый кепте карап коятаган болыпты. Ол колына не зат алса да, эш бир затты сонъына дейим еткермеген. Соннан себеп ога аьдемлер Болмас-Кылый деген ат та бергенлер. Болмас-Кылый оьскен заманда, бай киси оьзининъ баласын шакырады эм айтады:

– Эндигиси сага уьйленмеге, балам, заман да етти. Сендей акылсыз биревге ким кызын берер экен? Эндигиси сен йолга туьс эм оьзинъе аьел изле!

Оьзинъ тап!

Акылысызга узакка бармага кереги де йок. Байдынъ улы базарга барады эм мага аьел керек, тапшынъыз деп тилек салады. Онынъ соьзин эситкенлер тек куьлип коядылар экен.

Тез арада базарга оьзининъ артыннан эшегин ериткен бир киси келеди. Ондай ма ман бир уьйкен савыты да болыпты.

– Ачув-Чун, – деп йолыгадылар оны куьпселер де. – Май ман савыт алып юруьв эр кисидинъ куллыгыма аьши? Сен этетаган не зат? Сенинъ пишенъ кайдады? Кызынъ кайда?

– Меним кызым бир акылсыз зат, – дейди ол явапка. – Бизим майды сувга авыстырып кояды. Уьйде олтырганы яхшы ды онынъ!

Байдынъ акылсыз улы акылсыз акында айтканды эсители эм ойлайды: «Аьне ол кыз меним аьелим болса экен!» Сонъ Ачув-Чунга йолыгады эм оннан сорайды:

– Ачув-Чун, сага мен кудаларды йиберсем калай коьресинъ?

Ачув-Чун ога селеке этип куьлгендей коьреди эм сонъында айтады:

– Кудаларынъды меним эшегиме йибермеге болаяксынъ.

Байдын акылсыз улы Ачув-Чун оьзининъ товарын тоьккеншеге дейим саклап турады. Сонъ эшекке янасады эм оннан сорайды:

– Эшек, ай, эшек, байдынъ кызын кайтип айттырмага болаяк аьши?

Эшек оннан не зат керегин анъламайды. Байдынъ улыннан баска якка тайып калады. эм аяклары ман май турган савытка тийип кетеди. Май тоьгиледи эм оны коьрген Болмас-Кылый шавып кетеди. Сол заман Ачув-Чун эшегине минеди эм бай улынынъ артыннан йоьнейди.

Болмас-Кылый сондай да бир куьшли ювырган эм конъысы авылга келип калган. Онда да бир кызды коьреди: ол шипийлерди бир ыслайды, бир йиберип турады. Йолда болса тастарга оралган бир неше юмыртка да ятыр. Кыз сол тастарды бир ыслайды, бир оьленге карап таслайды.

– Ай, кыз, сен не этесинъ? – деп, Болмас Кылый оннан сорайды.





– Мага коьмек берши, – дейди кыз, – бизим уьйде тавык бала ятады. Аь мине тавык шипийлери мен юреди. Атам базарга кеткен эм мага бала яткан тавык астындагы юмырткалары сав болып турсын деген. Кара, биревиде бузылма-сын, шипийлер яйылып кетпесин, деген. Аьши оны кайтип этейимтагы?

– Онда не бар, – дейди сол заман Болмас-Кылый да. – Шипийлерди тавыкка байламага керек. Болды.

Кеде юмырткаларды боьркининь астына тыгады. Кызга шипийлерди ысламага коьмеклеседи. Сонь оларды тавыкка байлайды экен. Сол заман карагус келеди эм шипийлерди алып кашады. Кыз, да кеде де карагус артынан карап каладылар.

Ачув-Чун эшеги мен уьйине кайтып келеди. Краса – май да йок, шипийлер де йок. Таякты алып байдынь акылсыз кеседин тоьбелейди. Кедединь боьрки астындагы юмырткалар баьриси де бузылады-



лар. Онынъ бети сап-сары болып токтайды.

Сол заман Ачув-Чун мен баллады оьлтирдим деп коркады. Ол кедеди сарайга аькетип калдыклар арасына тыгып таслайды. Сонъ оны авлакка аькетип таслар ман деп ойласады экен.

Сарайда Ачув-Чуннынъ сыйыры авырыйтаган болыпты. Ачув-Чун кеште эшшегин де сарайга аькетип тыгады. Сонъ кызын шақырады. Огы кынжал береди эм айтады:

– Сен мунда конасынъ. Эгер сыйыр оьлеек болса, сойып та кой! Эт болар!

Туьн ортасында Болмас Кылый калдылар арасында уянады эм куьрсинеди эди. Ачув-Чуннынъ кызы бу сыйыр куьрсинеди деп, кынжалын алады эм оны сояды. Болмас-Кылый турады эм бай кызы ога айтады:

– Не яхшы болды сен турып. Бизге баягы кусты таппага керек – шипийлерди урлаган. Шипийлерге уйкламага керекше.

Бу заман эшек бирден куьрсинип алады.

Байдынъ кызы мен сыйырды ярты сойдым кусайды деп, ойласады эм Болмас Кылыйга кынжалды береди эм айтады: «СОЙ!»

Байдынъ акылсыз улы эшекти сояды.

Эртен Ачув-Чуннынъ акылсыз кызы эм Болмас-Кылый кеше не зат эткенлерин коьредилер эм кашпага деп ойласадылар экен. Ачув-Чун азбарын ийги этип япкан болган эм тамлары да бек бийик болганлар.

Болмас кылый арбага минеди. Арба тамнан эрек кетип калмаса! Эм олар экеви де курыкта илинип каладылар.

– Меннен ийги этип тут, – деп кышкырады бай кызы тоьменге карай берип, – мен аьли сага арбады ийтеп йиберермен!

Экеви де колларын ядылар эм эке-

ви де тоьменге карап кетедилер. Болмас-Кылый кызга айтады:

– Сен йогарыда турып болмайсынъ. Тоьменге туьс. Кеде курыкка етти. Бай кызы кедединъ аягын ыслады эм сонъ олар экеви де ерге йыгыладылар. Сол заман Ачув-Чун уянады эм терезеден азбарга карап турган болады экен. Кыз бан кедединъ акылсыз экенин коьре турып, бай ойласады:

– Сосы кеде меним кызымды тилейди. Неге ога мен бермеймен аьши? Берейим. Меним майым эм меним шипийим сама сав турарлар...

Болмас-Кылый байдынъ кедеси экенин билгенде, Ачув-Чун майын да, шипийин де мутады экен. Оьлген эшегин де эсине алмаган...

Кызына болган затын берип, Ачув-Чун ясларды бай уьйине йибереди. Болмас-Кылыйга орындык береди, кызына – туьрли савытлар.

Эндигиси йол тавга карап эди. Бай улы арыйды, терлейди. Орындыгын йолга таслайды эм ашувланып айтады:

– Менде эки аяк. Сенде – доьртев. Оьзинъ юрип бар.

Ачув-Чуннынъ кызы оьзининъ югининъ бир кесегин бай улына береди. Сонъ булар булакка етип каладылар. Мунда Болмас-Кылыйга юк авыр болып коьринеди.

– Бизге секерди алып юруьв неден керекти? – дейди ол. – Шай ишмеге суьйсек бу булакка келермиз.

Эм баьри югин сувга атып таслайды.

– Аьши бизге мунда аьр заман келмеге неден керек! – дейди кыз да. Эм баьри затларын да сувга таслап койяды.

Болмас-Кылый атасынынъ авылына кайтады. Эм оларды коьргенлер айтканлар:

– Ачув-Чуннынъ кызы Болмас-Кылыйга энъ де келисли аьел...

*Кобширген С.Култаева.*





# Неге

Неге яздынъ келип турган шагында  
Ямышыдай булыт коькти каплайды?  
Тереклердинъ ак туьтини шыкканда  
Шешеклерин сувык ямгыр шыклайды?

Неге денъиз, толкынларын кувалап,  
Тыныш таппай, арды урып ойнайды?  
Неге бир кыз коьзяслары тымалап,  
Данъиз бойда оьксип-оьксип йылайды?



# Келе болар эсиме

Байрам куьнде эркинликке суйинип,  
Шав-шувласып ойнайдылар балалар.  
Эм оларды, терек туьпке йыйылып,  
Куьлемсиреп коьзлейдилер аналар.

Сол арада ярык болып коьнъили,  
Бийик бойлы шолак агай карайды.  
Кенъ тоьсинде ордени мен медали  
Юрген сайын йигитликти шынълайды.

Дав йылларда канын тоьккен бу ерде,  
Ол белгили аьр бирине ногайдынъ.  
Кайгылыктынъ куьлеткиси бир бирде  
Тап булыттай ябар юзин агайдынъ.

Эште шатлы эм кайгылы вакытта,  
Тынълап турса балалардынъ сесине,  
Янын берген досы авыр согыста  
Келе болар сол агайдынъ эсине.





# Карагер

Баганага байлы турган  
Кисинейди карагер.  
Туягы ман тез-тез урган,  
Куйы болды кара ер.  
Карагерде кан кайнайды,  
Кырга оны шакырып.  
Бир еринде ол турмайды,  
Кетемен деп кутырып.  
Босаттым мен карагерди,  
Босагадан атылып.  
Бослык суйген юрегимди  
Ол козгады ымтылып.  
Ал, карагер кала энди  
Карагустай оьрейик.  
Сол оьрувде тувган элдинъ  
Ярасыгын коьрейик.





# Савга

(хабар)

**Б**ир киси юрип бараятырган заманда йол уьстинде тас табады. Баалы тас. Эм оны патшага алып барады экен. Онынъ азбарына киреди эм патшадынъ куллыкшыларыннан сорайды:

– Мен патшады коьрсем экен.

Патшадынъ бир куллыкшысы оннан сорайды:

– Сага патша неден керекти? Келген киси себебин айтады. Сонда куллыкшы ога:

– Аьруьв болар. Мен патшага айтарман. Тек сен сага патша бергеннинъ яртысын мага берерсинъ. Яхшыма? Эгер дейим бермеек болсанъ, сени патшага йибермеймен.

Келген эр киси разы болады. Эм ол патшага барып ога бир аьдем келгени акында билдиреди. Патша сол кисидинъ берген тасын суйьинип алады эм ога айтады:

– Ал, аьши айт, сага мен кайдай савгады аьли окына берейим аьши?

Келген киси де ога яваплайды:

– Ай, патша-ян, сен мага элли сыбырткы урувын берсенъ, болып калаяк. Баскалай савга мага керек те тувыл. Мен сенинъ кулынъ ман соьйлестим: берген савгады ортасыннан боьлмеге деп. Тек мага йырма бесин бересинъ эм ога да йырма бесин...

Соьне эситкенде патша шеги катып куьледи. Кулын уьйиннен кувып йибереди. А келген кисиге савга эсапта мынъ маьнет акшасын береди.

Соьлеги киси суйьинип алады эм патша азбараннан шат коьнъилде шыгып кети.

*Коьширген А.Утеев.*



# Жуьлгенжитъ пайдасы барма экен!

**Ж**е уьшин биз бирден куьлеп баслаймыз, аьлимлер аьли де себебин дурыс билмейдилер. Тек олар куьлкидинъ кайдай пайдасы барлыгын ийги кепте уьйренип алганлар демеге боламыз. Сонынъ акында айтып алайык.

Бириншилей, куьлкидинъ заманында беттинъ кеплеген мышцалары куьшли кепте куьллык этедилер. Соннан себеп куьлки ойлавды эм эсти куьшлендиреди деген токтастырув да бар.

Экиншилей, куьлкиден тура шарктынъ иммунный йорыгынъ куьллык этуьви куьшленеди экен. А ол да, тез-тез куьлетаган аьдем аз авырыйтаганын коьрсетеди.

Уьшиншилей, куьлки заманында шаркта айырым болган затлар асылландырылады – эндорфинлер деп. Оларды тагы да наьсиптинъ гормонлары деп те айтадылар. Эндорфинлерден себеп аьдемнинъ коьнъилининъ шатлыгы эм куванышы узак заманга дейим сакланады. Соны ман уьйкенлерге де эм кишкейлерге куьлки пайдалы болып калады.





# Аты мутылмас йигит

**Б**екбаев Жумагали Рашид улынынын акында савлай Ханты-Мансийск автономлы областинде биле эди. Кизляр районунын Огузер авылында 12 коькекте 2005 йылда тувган. Олардын аелинде уш йигит: Жумагали – ортаншысы эди. 2012 йыл Бекбаевлер аели мен Федоровский поселокка ислемене келдилер. Жумагали бала заманнынан алып спортка аваслыгы айлак куышли болган бала 3 класстан баслап тайский бокс пан кызыксынып баслады эм сол йыл ок Федоровский поселокта озган Первенствода биринши орынды байырады. Сонгы енъувлер ызлы-ызыннан онын спорт йолына йигерли абытлаганын коьсетип турдылар. 2016-2017 йыллар ХМАО-да озган ярысларда 1 орынларды алды. 2017 йыл 3 кере чемпион болды, Омск, Нижний Тагил, Томск калаларда 1 орынларды алып, мойнына медальлер илинди. 2 орынларды Жумагали Уральский Федеральный округта эм Федоровскта алды. Коьрмеге сылув, бавырмалы, тап-таза ногойша соьйлеп билген ясты коьрген-таныган аьдем сукланып карайтаган эди. Аьр каникулда олар аели мен тувган авылына келип, аданаслар-дослар болып онын кумлы орамларында ойнап, ясы уьйкенлерине коьмек этип юретаган эдилер. Озып кеткен йылдын азында аели мен Фе-

дороскийге кайтып бараятканда хаьтелендилер. Жумагалидиди йойдылар... 1) Битпес яра юреклерди бийледи. Аьли де алдыда оны коьпенъувлер куьте эди. 2) Яткан ери еннет болсын. Ата-анасына, аданасларга Алла куьш берсин калганлар уьшин яшамага.

«Ногай Эл» ямагат организациасы етекшиси Камалатдин Чатырбаев пен, тайский бокс бойынша тренери Артур Вагапов эм Сургут районунын маданият эм спорт тармагынын етекшилери Жумагалидидин эстелигине багысланган тайский бокс бойынша турнирди 21-23 карагыста уйгынладылар. Турнирде спорт йолында уьстинликлер йорап, муфтий насыьхатшысы К.М.Магомедов. «Яс спортсмен аты бир де мутылмаяк!» – деген соьзлер занъырадылар. Онда Ямало-Ненецкий, Ханты-Мансийский округтын Нижневартоск, Нижний Сортым, Сургут калалары, Омск области, Федоровский поселогы катнастылар. Биринши орынды Федоровский байырады, командадын коьбиси ногой йигитлер эди. Жумагалидидин малек яны ак аспаннан суьйинип тургандыр, деген ой, енъил елемиктей, баьрине де келди. Аз яшаса да, озиннен сонъ ярык ыз калдырган йигит аты бир де мутылмаяк.

*Салимет Майлыбаева*



# Турнирден кӱбинислер



АДМИНИСТРАЦИЯ СУРГУТСКОГО РАЙОНА  
УПРАВЛЕНИЕ КУЛЬТУРЫ, ТУРИЗМА И СПОРТА  
АДМИНИСТРАЦИЯ СУРГУТСКОГО РАЙОНА

**ОТКРЫТЫЙ ТУРНИР  
ПО ТАЙСКОМУ БОКСУ  
«СЕВЕРНЫЙ РИНГ»  
ПАМЯТИ ЖУМАГАЛИ БЕКБАЕВА  
пгт. ФЕДОРОВСКИЙ**

17-19 марта  
СК «Алроса»  
ул. 50 лет ВЛКСМ, 1А

21 декабря	22 декабря	23 декабря
15:00	11:00	12:00
НАЧАЛО ПОДЪЕМА	ПОЛУЧИЛИ	ТОРАЖЕСТВЕННОЕ ОТКРЫТИЕ ВЕЧЕРА

СОЦ  
«ФЕДОРОВСКИЙ»  
ул. ПИОНЕРНАЯ, 96





# Бай тоьбе

(болган зам)

**Д**агыстаннынъ Хасавюрт районнынъ Аксай авылынынъ куьнбатар бетинде ондай бир уьйкен болмаган Бай тоьбе деген тоьбе бар. Не уьшин ога Бай тоьбе деп ат бергени мен коьплеген йыллардан бери кызыксынып келедилер эм онынъ акында аз язбаганлар. Аксай авылыннан бир окытувшы муннан онлаган йыллар артта Чогар-отар авылында кол ман язылган китап бар эм сонда Бай тоьбе акында язылув бар деп эсители. Сонъ ол сосы китаптинъ иесин табады. Оннан мага сосы китапти бертагы деп тилейди. Онынъ иеси ашувланмай-тарланмай, булай деген: «Мен сага сосы китапти беремен, тек сен мага онынъ орынына бир аьруув сыйыр берсенъ!» деп. Окытувшы бас дегенде саьспеклейди, ашувланады, тарланады. Бермеегин билген сонъ, сыйыр береди эм соьлеги китапти оннан алады. Китап болса, араб тилинде язылган болыпты эм соьлеги тоьбе акында булай язув болган: «Эки кардаш яшаган болыпты. Кишкей аданасынынъ ери Бай тоьбеде болган. А агасынынъ ери болса-конъысы Караногай элинде болыпты экен. Инисинде ул тувады. Эм ол онынъ акында агасына Ногай шоьлине хабар-янъылык йибереди. Агасы сосы йылы хабарды эситип инисине етпеге алгасайды. Ол оьзи мен бирге атлар, койлар, солай ок коьплеген баалы затларын алып келеди. Алган савгаларынынъ ишинде кишкей йиени уьшин аьлемет савга да болган-алтын бесик. Агасы инисине келгенше, бир уьйкен кайгы тувьседи-соьлеги кезде бирден оьледи. Оны алтын бесикке салып коьмедилер. Соннан бери сосы тоьбеге Алтын Тоьбе деген ат та коядылар экен.

Соьлеги аксайлы киси тоьбеди асты-уьстине айландырады. Коьп кыйын салганнан сонъ, бесикти тавып та аладылар. Тек

не пайда-оларга тамамы эндигиси ондай бир кызыксынув тувдырмаган экен...

Сосы аьлемет хабарды аты дагыстан еринде тувыл, онынъ тысында да ийги белгили болган, СССР-динъ хакл окытувшысы Булач Гаджиев язып алган болган. Мен ол сав заманында оннан «Ол аданаслар миллетлери бойынша кимлер болганлар, билмейсизбе?» деп, сораганда.

– Иним, мен ол ягы ман кызыксынмаганман, – деди. Сонъ тагы да косты: – Ол заманда Кумык шоьллигинде коьп ногайлар, Ногай шоьллигинде коьп кумыклар яшаганлар. Бир-бири мен ийги катнасканлар: кыз алганлар, кыз бергенлер. Коьп ювыклык тутканлар. Бир ювык кардашлардай болып турганлар... Калганын оьзинъ анълай боларсынъ...

*Аьзирлеген А.Утеев.*





# НОМАКЛАДА



\*\*\*

Куъшли ийис бар менде,  
Шешекейим увтатык.  
Мен ъсемен кенъ шѡьлде,  
Эркинликти яратып.

\*\*\*

Ярыклыкты уйге мен,  
Кызганмайын себемен.  
Ойланманъыз куън, ай деп,  
Дем аламан мен май еп.



\*\*\*

Кебим-тамам доьнъелек,  
Карт койнында мен барман.  
Иштелигим ак ѡтпек,  
Енъиз ас пан май, бал ман.



\*\*\*

Самолета бу зат бар,  
Ол кустынъ да муъшеси.  
Излестирген тез табар,  
Туспарласа ѡз исин.



# Балалар обзлери ясайдылар



Мукминат  
Джумаева  
4»а» класс.

Лейла  
Алимамедова  
1 класс.



Оразбийке  
Адджишиева  
2»а» класс

Сулак поселогынынъ 21-нши номерли  
школасынынъ окушылары.



## Соколёнок Лашын

2/2019

март - апрель

Иллюстрированный детский журнал.  
Издается один раз в два месяца.

**Учредитель:**

Министерство информатизации, связи  
и массовых коммуникаций Республики  
Дагестан.

Регистрационный номер  
серия ПИ №ТУ05-00413 от 22.04.2019 г.  
выдан управлением Роскомнадзора  
по Республике Дагестан.

Издается с января 1990 г.

**Руководитель – главный редактор**  
Мурад Ахмедов

**Редколлегия:**

А.Исмаилов (зам. гл. редактора)  
Т.Зургалова (отв. секретарь)  
А.Култаев  
Б.Кулунчакова  
М.Авезов  
С. Майлыбаева  
С. Култаева (редактор выпуска)

**Художественный редактор** З.Даганов  
**Технический редактор** Т. Лузина  
**Художник номера** А. Самарская

Формат 60x84 1/8  
Бумага офсетная.  
Уч. изд. л. 2,71.  
Уч. печ. лист 3,26.

Сдан в печать 6.05.2019 г.  
Выход в свет 15.05.2019 г.  
Тираж 268 экз.  
Заказ № 367.

**Типография:**

ООО «Издательство «Феникс-пресс».  
**Адрес типографии:**  
367018, РД, г. Махачкала, ул. Петра I, 61.

**Редакция и издатель:** Государственное  
бюджетное учреждение Республики  
Дагестан «Редакция республиканских  
литературных журналов «Соколёнок»  
и «Литературный Дагестан».

**Адрес редакции и издателя:**  
367000, РД, г.Махачкала,  
ул. Даниялова, 55.

**Электронный адрес редакции:**  
litdag@mail.ru

Ногайский язык.

Индекс: на год - 63238,  
на полугодие - 78432.

Цена свободная.